

03 DEC 1998

KERAJAAN NEGERI TERENGGANU TURUT BERI BANTUAN RM400

KUALA TERENGGANU, 3 Dis (Bernama) -- Semua kakitangan kerajaan negeri Terengganu akan diberikan bantuan RM400 seperti yang diperolehi kakitangan kerajaan persekutuan.

Menteri Besar Tan Sri Wan Mokhtar Ahmad hari ini berkata bantuan itu diharap dapat membantu kakitangan kerajaan menguruskan persekolahan anak-anak mereka pada awal Januari depan.

"Bantuan itu juga merupakan satu insentif kerajaan sebagai mengenang jasa mereka berkhidmat dengan baik dan memohon bantuan sebagai ganti bonus tahun ini dengan cara perundingan," katanya dalam satu kenyataan di sini.

Beliau berkata cara yang ditunjukkan oleh kakitangan kerajaan yang memohon bantuan itu melalui rundingan dan bukannya menerusi mogok atau berpiket, sangat dihargai oleh kerajaan.

Katanya bantuan itu juga menunjukkan keprihatinan dan pengorbanan kerajaan terhadap kakitangannya untuk membantu dalam keadaan kegawatan sekarang dan mengharap pihak swasta turut memikirkan perkara yang sama untuk membantu pekerja mereka.

Semalam semasa merasmikan konvensyen Cuepacs ke-21 di Pusat Belia Antarabangsa di Cheras, Perdana Menteri Datuk Seri Dr Mahathir Mohamad mengumumkan kerajaan akan memberikan bantuan RM400 seorang kepada semua kakitangannya, kecuali mereka dalam jawatan utama sektor awam, tahun ini.

Menurut Dr Mahathir, walaupun ekonomi dan kewangan kerajaan begitu berkurangan sehingga negara akan mengalami defisit RM16 bilion bagi 1999, tetapi kerajaan sedar akan masalah yang dihadapi oleh kakitangannya.

-- BERNAMA

SBS NAK